

2026-imut aningaasanut inatsisissatut siunnersuut.

(Aningaasaqarnermut Akileraartarnermullu Naalakkersuisoq)

(Siullermeerneqarnera)

Qujanaq Naalakkersuisut 2026-imut aningaasanut inatsisissatut siunnersuummut saqqummiunneqartumut.

Uagutsinnut Demokraatinut aningaasanut inatsit aningaasartuutini isertitanillu naatsorsuutini takutitsissutaannaangilaq. Aqutsinermut sakkussaavoq iluatinnaatilik, politikikkut pingaartitatsinnut tapertatut atugassarput.

Aningaasaqarnikkut akisussaassuseqarneq ersarissuliornerlu. Isumaginninnikkut naapertuilluarneq inuttullu ataqqinassuseq. Ilinniartitaaneq siumut isigisoq peqqinnissaqarfillu nukittoq. Inuussutissarsiorneq eqeersimaartoq sulisullu amerlanerit. Mingutsitsinngitsumik inaallagissiorneq, kinguaariit tullissatsinnut iluaqutaasussat.

Aallaavipput ersarippoq. Aningaasanut inatsisip taakku anguniagassat tapersissavai naallerarnagit. Taamaattumik piumasarisariaqarparput oqimaatigiisitsineq ineriartortitsinerlu, aaqqissuusseqqinerit inunnullu aningaasaliinerit.

Anguniakkagut pingaarnerit tassaapput Kalaallit Nunaat imminut nammannerusoq nukittuumik ataatsimoorfiusoq nammineerluni aalajangiisinnaanerusoq. Tamanna aalaakkaasumik aningaasaateqarnissamik aallaaveqartussaavoq. Aaqqissuusseqqinerit, nukinnik pisortaniit aammalu namminersortuniit sulisunit amerlanerulersitsissapput. Aammalu pisariaqarluni suliassat pingaaruteqarluinnartut, innuttaasunit uagutsinnut kivinneqartussatut naatsorsuutigineqartut, tulleriaarnissaat.

Maannakkorpiaq aningaasaqarnikkut inissisimaneq eqqaassagutsigu siuariartorneq kigaallisimaarpoq, isertitassaaleqineq aammalu aningaasartuutit annertusiartornerat pissutaalluni, pingaaruteqartorujussuuvoq, aningaasatigut akisussaassusilimmik ingerlatsinitta attannissaa. Siunissamut ungasinnerusumut isigisariaqarpugut qulakkeerlugulu, nunatta ingerlanneranut aningaasaateqarnissaq kinguaariinnut tulluuttussanut naammattunik.

Aningaasanut inatsisissatut siunnersuut piffissami qinigaaffiusumi uani siullersaavoq aningaasaqarniarnerlu, ukiorpassuarni kusanartumik takutitsisarsimasoq, maannakkut unikaallassimasoq. Tamanna ilaatigut peqquteqarpoq aalisarnermit isertitat appariarsimanerannik, mittarfissuit sananerisa naammassinerannit aammalu inuussutissarsiortut suliassakissimanerannit. Taakku saniatigut namminersorlutik oqartussat



pigisaat ingerlatsiviit iluanaarutissaattut naatsorsuutaasimasut nalimmassarneqarsimallutik. Taassuma takutippaa akisussaassusilinnik toqqaasoqarsimasoq ersarissunillu pingaarnersiuisoqarsimasoq.

Tassungalu ilutigalugu siunissamut ungasinnerusumut ilusilersuinernut unammilligassat annertuumik ersarissisimapput. Inuit ukiumikkut sulisinnaasutut nalilerneqartut avataaniittut annertoorujussuarmik amerlisimapput. Utoqqalinersiutitut aningaasartuutit annertusipput, isertitat ilaatigut inuit akileraarutaaninngaaneersut apparnissaat ilimanaateqarluni. Aaqqissuusseqqiinerit malunnaatillit ingerlanneqanngippata ajoraluartumik aningaasaqarniarnikkut ajornartorsiulissaagut ataavartumik, taamaattumillu maannakkorpiaq akiliisinnaassuseqarnerput eqqarsaatigisariaqarparput aammalu tassunga ilutigalugu attanneqarsinnaanerani siunissamut ungasinnerusumut.

Akiliisinnaassuseqarneq qaangiataaginnarsinnaanngilarput. Taamaattumik silatusaarnervuq, siunniukkaanni, ukiut sisamat tulluuttut sinneqartoorfiunissaat. Erseqqissarneqassaarli, naatsorsuutigisat aallaavigalugit, siunissami ukiut arlallit pisussanik isigisumik missigersuusiorneq ulorianaateqarsinnaammat. Taamaattumik Demokraatini isumaqarpugut, suliunitigisariaqaripput, aningaasanut inatsisissatut siunnersuut aamma 2026-imi sinneqartoorfiussasoq. Tamanna isumaqatiginninniarnissani ukkatarissavarput.

Eqqaamassavarput, una aningaasanut inatsisissatut siunnersuut nunat tamalaat akornanni najumatsisimanerujussuup, nalorninerup akerleriinnerullu nalaani sananeqarsimammat. Nunat assigiinngitsut akornanni politikkikkut eqqissiviittoqarpoq, niuernermeri akerleriittoqarpoq nunarsuarmilu tamarmi siuariartorneq arriilleqqalluni. Taassuma maani nunatsinni patajaatsumik aningaasaqarnermut politikkeqarnissatsinnut pisariaqartitsineq annertusarpaa. Nakkutigisinnaanngisatta aallaaviat taama sukkatigisumik allanngortartillugu, silatusaarnervuq iliuuserisassanut periarfissat attannissaat, qulakkeerlugulu aningaasaqarnerup avataaniit unammilligassanut akiuussinnaanissaa.

Iliuuseqarnissamut pilersitsineq pingaarnersiuiinneruvuq silatusaarnervuq. Aningaasanut inatsisissatut siunnersuut takutitsivoq, isumaqatiginninniarnerni iliuuseqarnissamut pilersitsisoqarsinnaasoq pingaarnersiuiinerit allanngortinnerisigut, naleqqussaannikkut aammalu allannguisinnaannikkut apeqqutaatillugu, politikkikkut pingartitat nutaat aningaasassaqaartinneqarnersut. Tassunga atatillugu nassuerutigisariaqarparput, suut tamarmik ataatsikkut pilersinneqarsinnaanngimmata. Aallaavik taanna unneqqarinnerusumik politikkerinnermik aaqqiissutinillu patajaannerusunik pilersitsissaaq. Demokraatinut missigersuusiornermi pissuserissaarneq pitsaasumik ingerlatsinnermiik ilisarnaataavoq. Inunnut iluaqutissiisussat periarfissiisussallu akuersaassavagut, sapiissuseqarlutalu itigartitsinissatsinnut akerlianik sunniuteqartussanut.

Tassungalu ilutigalugu aningaasanut inatsisissatut siunnersuut alloriarneq siulliuvoq aaqqissuusseqqiinerit suliarinissaannut kisiannili tamanna inernerussanani. Naalakkersuisooqatigiit isumaqatigiissutaat aamma Attassiinnarnissamut ineriartortitsinissamullu pilersaarut 2-mi sulinissamut pilersaarut aaqqissuusseqqiinissanut tunngaviussapput, inuussutissarsiornermik nukittorsaaussat, pisortat



ingerlataasa eqaannerulernerannik aammalu sulisunik nukittunerusunik ineriartortitsinissamut.

Sukaq najummisoq tassaassaaq pisortat ingerlataanik aaqqissuusseqqiineq. Angusassaaq akunnaappoq, eqaatsuulluni aammalu aningaasaqarnikkut attanneqarsinnaalluni, nunami sumi inissisimanerput siammarlutalu najugaqariaatsitsinnut naleqqussarsimasoq. Teknologi ullutsinnut naleqquttoq, silassorissuusaaq aammalu ungasianiik sullissinerit atorneqassapput innuttaasut sullinneqarnerannut qanillisaatitut aammalu suliaassanut pingaarutilinnut nukinnik inuttassaqartitsinissamut. Pisortat ingerlataasa ullutsinnut naleqqussarnerat taamatuttaaq najugaqariaaseq aallaavigalugu, piffiit atorfissaqartitsinerulersut annertunerusumillu atuiffiunerusut sammineqassallutik. Demokraatinut pingaarnerpaavoq, aaqqissuusseqqiinerit sipaarniaannarluni suliarineqassanngitsut, sullissinerulli pitsaanerulernissaanik siunertaqassasut, pitsaassuseq annertunerusoq qanilaarnerlu annertunerusoq. Taamannak oqareerluta, iluarisimaarparput, sipaarniarnerujussuaq siunnerfigineqarmat aammalu pisortat allaffeqarfiisa naammassisaqarnerulersinnissaat. Ukiopassuarni tamanna pisariaqarsimavoq. Ukiopassuarni tamanna kissaataasimavoq. Nuannerpoq, maannakkut iliuuseqarfigineqalernera.

Sukaq pingaarutilik alla tassaavoq inunnut aningaasaliineq. Inuusuttut amerlanerit inuussutissarsiutaasinnaasunik ilinniagaqarsimassapput, sulisullu suniluunniit branche-ni piginnaasaqarluartut tigummiinnarnissaat sulerusussuseqarnissaallu aalajangiusimassavarput. Aatsaat taamaaliornitsigut inuk kivissinnaalissavarput inuiaqatigiillu nammassinnaasaat annertusarlugu, assaat ikinerit annertunermik kivitsissanngormata. Demokraatit toraagalinnik suliniuteqarnissaaq kissaatigaat, atuarfimmiit suliffimmut ikaarsaarnerup pitsanngorsarnissaanik pilersitsisunik, aammalu allanik ilinniaqqinnissamut ingerlariaqqiffiusumillu ilinniagaqarnernut tapersiissutitut.

Atugarissaarneq pigutsigu ataatsimoortumik eqqarsassaagut. Pinaveersaartitsineq siusinaartumillu suliniuteqarnerit isumaginninnikkut-, peqqinnissakkut- aamma ilinniartitaanikkut inuttut inuunerinnerulernermik pilersitsissaaq sulisunillu amerlanernik atuisinnaatitsilerluni, suliaassanut pingaaruteqarluinnartunut ukkatarinnissinnaanissatsinnut. Piviusoq maani nunatsinni unaavoq aaqqiinnisanik pisariaqartitsigatta, illoqarfinni aamma nunaqarfinni atuussinnaasunik, aammalu digitalimik atuinnermik periarfissanik atuisussamik sanngiinnerpaat sumiginnanngikkaluarlugit.

Ersarikannersumik ilisimavarput, aningaasaqarnikkut unammilligassat sumik peqquteqarnerisut. Tassaapput utoqqalinersiutitut aningaasartuutit qaffakkaluttuinnartut, akileraarutitigut isertitat appartinneri aamma qummut killiliinerit taamatullu namminersorlutik oqartussanit pigineqartut ingerlatsiviit iluanaarutaasa appasinnerunissaannik naatsorsuuteqarneq. Taanna unneqqarissumik pissutsinik annissineq pingaaruteqarpoq, tamanna iliuuseqarnissatsinnut pisussaaffiliigami. Taamaattumik Demokraatit suliniuteqarusupput, suliffissanik annertusaanermik, akilersuutit ullutsinnut malinnaasunngortinniarlugit aammalu aningaasaliissutitut aallarnisaasunullu sinaakkutit pitsanngorsarnerisigut. Aatsaat taamaaliortutta attanneqarsinnaasumik oqimaaqatigiisitsinnaavugut, kisianni atitunermik aammalu aningaasatigut patajaannerusumik tunngaviliinikkut, attanneqarsinnaasumik aamma kinguaassatsinnut tulluittunut.



DEMOKRAATIT

Taamaattumilluuna eqqortuusoq, Naalakkersuisut isumaqatiginninniutaasussatut saqqumiussaminni erseqqissarmassuk, Inatsisartunit aningaasartuutitalinnik kissaatit aatsaat pisinnaasut pingaarnersiunerit allanngortinnerisigut aammalu aatsaat akissaqartinneqarpata. Demokraatinut politikikkut sakku pitsak. Suliniutinut nutaanut akuersigutta, aamma akisussaaffigissavarput, qanoq suliniutit taakku akilernerqassanersut. Taamaasilluta missigersuummut tatiginninnerput attatissavarput politikkimilu toraagarput attallugu. Neriutigaarput, Naalakkersuisut sapiissuseqassasut taanna pullavik aalajangiusimassallugu isumaqatiginninniarnissani aggersuni.

Mingutsitsinngitsumik attassinnaasumillu innaallagissiorneq aningaasanut inatsisissatut siunnersuummi uteqattaarneqarpoq. Attassinnaq silaannarmut avatangiisinullu kisimi pinngilaq. Aamma isumaginninnikkut aningaasaqarnikkullu attassinnaanermut tunngavoq. Eqqarsaataavoq inuiaqatigiinnik pilersitsinissaq ataqatigiissunik piffissap ingerlanerani. Inuiaqatigiit, akiligassaminnik akiliisinnaasut, atugarissaarnermik tunniussisinnaasut, aammalu meerartagut pitsaaneruseqatut siunissaqartussanngorlugit qimattussanngorlugit. Uani aningaasanut inatsit marloriaammik suliaasaqarpoq. Ullumikkut allanngujuissusermik qulakkeerinissaq aqagumullu ineriartornissamut pitsaasunik tunngaviliisimasoq. Demokraatit taperserpaat, allannguneq aqqissuuseqqiinnerut atassuserneqassasoq sulisoqalissasugullu nukittunernik, inuit kivinniassagatsigit siuariartornissamullu periarfissanik pilersitsilluta.

Pingaarnertut isumaqarpugut, toraagaq, uuminnga aningaasanut inatsisissatut siunnersuutigineqartoq eqqortuusoq. Aqqissuuseqqiinnerut piumassuseqarnerullunilu akisussaassuseqartumik aqutsineq aammalu aningaasaliinerit sinaakkusiussanut inuiaqatigiinnut nukittunerulersitsisussat. Demokraatit angorusutaat siusinnerusukkut taakkartorneqartoq kisitsisit oqimaaqatigiisinnissaannaannik isumaqanngilaq, nunamulli tunngaviliinissamik siunertaqarluni, meeqqat ilinniartinneqarlualutik inuttullu nakuunerulerlutik atuartinneqarnissaat, taamaasillutik inuusuttut takusinnaalerlugu ilinniarnissani suliffinnilu periarfissaqarlutik, utoqqaat peqqinneq isumassorneqarneq pisariaqartoq pisinnaallugu, suliffeqarfiit qaffakkiartortut suliffissanik pilersitsisut, aammalu pinngortitamik paarsilluarluta tassunga ilutigalugu, eqqarsarlualuta atorsinnaalerlugu. Taakku anguniakkatut takorluukkat politikikkut sapiissusermik uteriinnermillu pisariaqartitsipput. Aningaasanut inatsisissatut siunnersuutip patajaatsumik aallaavilerpaatigut.

Ammalluta aalajangersimasumillu isummorsorluta isumaqatiginninniarnernut peqataassaagut. Kissaatit nutaat nerriviup qaanut ilineqarpata, aningaasartassai qulakkeerneqarsimassapput. Sipaartissanik nassaarutta, pissutissaqarlussapput qajassuussillutillu. Aningaasaliigutta, ersarissumik siunertaqassapput kingunissaalu uppersarneqarsimassallutik.

Atituunik, attanneqarsinnaasunik isumaqatigiinnissaq kissaatigaarput, uagut ersarilluinnartumik isumaqaratta, allanngujuissuseq suleqatigiinnermiit aallaaveqartoq. Aqqissuuseqqiinnerit tuaviortumik ingerlanissaat kissaatigaarput, inuiaqatigiit agguataarnerat sukkasuumik allanngorarmat.

Piumasaqaataavorli, aningaasatigut toqqammavipput annertusiartuaassagipput, aalisarnermi



allanngortoqarnera nunarsuarmilu tamarmi aningaasaqarniarnerup allanngorarnera
pakkersimaarsinnaaniassagatsigu. Piumasaqaataavoq, amerlanerit ilinnialerlutillu sulilernissaat.
Piumasaqaataavortaaq, pisortat ingerlataasa nukiit suliassanut pingaarutilinnut atussagaat, innuttaasut
maluginiassammassuk sullissineq, qanilaartoq, piffissaq eqqorlugu ingerlanneqartoq ataqtigiissorlu.
Uuminnga aningaasanut inatsisissamut siunnersuuteqarnikkut toraakkamut eqqortumut ingerlaassaagut.

Suliniutigissavarput, aningaasanut inatsisissavik naaperiaaffiusimassasoq nukittoq,
amerlanerussuteqartunik katersuutsitsisoq takorluukkanillu ataatsimoorussanik piviusunngortitsinissamut
qanillattortitsisoq.

Aningaasanut inaatsisissatut siunnersuut taamatut oqaaseqaatitaqarluni Aningaasaqarnermut- aamma
Akileraartarnermut ataatsimiititaliamut oqaluuserisassatut ingerlateqqinnissaa innersuussutigineqarpoq.